

Namminersorlutik Oqartussat tamakkiisumik piginnittuullutik aktiaateqarluni ingerlatseqatigiiffiini ataasiakkaani siulersuisunut ilaasortassanik toqqaasarnermi nunatsinni najugaqavissut amerlanerussuteqartut ilaasortaasalernissaannik Naalakkersuisut aalajangersagaliortut inatsisissamik UPA2017-imi saqqummiussassamik siunnersuusiogqullugit peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasorta Suka K. Frederiksen)

Akissuteqaat

(Naalakkersuisut Siulittaasuat)

Aappassaanmeerneqarnera

Aalajangiiffigisassatut siunnersuutip siullermeereernerata kingorna Inuussutissarsiornermut Ataatsimiititaliaq sukumiisumik isumaliutissiissusiorsimavoq. Namminersorlutik Oqartussat ingerlatseqatigiiffiutaanni siulersuisut katititaasarnerinut immikkut maleruagassiortoqarnisaanik kissaatigineqartoqartillugu eqqarsaatigeqqaagassat pingaarutillit arlallit ataatsimiititaliap isumaliutissiissummini saqqummiuppai.

Tassunga atatillugu ataatsimiititaliap erseqqissaatigaa siulersuisut katitigaanerisigut suliffeqarfiup pisariaqartitai ersersinneqartariaqartut. Ingerlatseqatigiiffinni ataasiakkaanni siulersuisut ingerlatseqatigiiffiit ingerlatsinerisa niurnerpalaartumik pitsaasumillu ingerlanneqarnissaanik aallaaveqarneq tunngavigalugu niuerfennut sammisaqartunik pikkorissunillu naalakkersuinikkullu akuleruffigineqaratik toqqarneqartarsinnaasariaqarput.

Ataatsimiititaliap ingerlatseqatigiiffinni siulersuisunut ilaasortat ataatsimut isigalugu affaat sinnerlugit ullumikkut Kalaallit Nunaanni najugaqavissuunerarlugit Naalakkersuisut siullermeerinninnermi paasissutissiissutaat eqqortuusooq uppersarparaa.

Taamaakkaluartoq ataatsimiititaliami ilaasortat amerlanerussuteqartut inassutigaat aalajangiiffigisassatut siunnersuut saqqummiunneqartoq Inatsisartunit akuerissutigineqassasoq. Tamanna Naalakkersuisunit tusaatissatut tiguneqalersaarpoq, taamaasillutik Naalakkersuisut ingerlatseqatigiiffinni namminersorlutik oqartussanit pigineqartuni siulersuisuni ilaasortat amerlanersaasa Kalaallit Nunaanni aalajangersimasumik najugaqartuunissaanik inatsisartut inatsisissaatut siunnersuummik suliaqartussanngorlugit.

Naalakkersuisut inatsisissatut siunnersuummik piareersaataasumik suliaqarnerminni ingerlatseqatigiiffinnut inatsimmut massakkut atuuttumut tunngasut aammalu ingerlatseqatigiiffinnut namminersorlutik oqartussanit pigineqartunut aammalu ingerlatseqatigiiffinnut namminersortunut attuumassutillit ilanngullugit nalilersussavaat.

Ingerlatseqatigiinnut inatsimmi aalajangersakkat naapertorlugit sulisut siulersuisuni ilaasortaaitassaminnut kiffaangissuseqarlutik toqqaasinnaanerinut tunngasut ilanngullugit nalilersorneqassapput.

Taamatut oqaaseqarlunga aalajangiiffigisassatut siunnersuutip saqqummiunneqartup aappas-
saaneernissanut Inatsisartut oqallinnissaat Naalakkersuisut qilanaarilereerpaat..